


JUDICIUM & DECRETUM  
**Universitatis Oxoniensis**

Latum in Convocatione habita


*Jul. 21. An. 1683.*

*Contra quosdam* PERNICIOSOS LIBROS &  
PROPOSITIONES IMPIAS, quæ

Capitibus sacratissimorum PRINCIPUM, eorum  
STATUI & REGIMINI, & omni HUMANA  
NÆ SOCIETATI exitium intentant.



E Theatro SHELDONIANO, 1683.



---

---

JUDICIUM & DECRETUM.  
UNIVERSITATIS OXONIENSIS

Latum in Convocatione habita

Jul. 21. An. 1683.



Uanquam parricidale facinus in Sacrum serenissimi Principis & illustrissimi Fratris ejus caput nuper designatum, omnem nostram sollicitudinem deponat, qua tam flagitiosum nefas Deo pariter & hominibus invisum, debita detestatione prosequamur; & dignas clementissimo numini gratias reddamus, cujus singulari providentia comparatum est, quod spiritus oris nostri Christus Domini non sit captus in laqueis ipsi positus, sed in umbra ejus nobis etiamnum vivere & superstites esse contigerit: Partium tamen nostrarum esse ducimus altius mentis aciem defigere in impia illa Dogmata, quæ nuper summo studio

dio in publicum sparsa, nefariis istis molitionibus causas & fomenta dedere; eademque justis censuris subjicere publicoque decreto damnare & confodere.

Itaque ad honorem sanctæ & individuae Trinitatis, & ad Catholicæ Doctrinæ veritatem in Ecclesia conservandam; porro ut Regia Majestas non solum a perduellium hostiumque, sed quorumcunque Schismaticorum insidiis facta tecta maneat, frequenti Convocationis Senatu die Julii 21. An. 1683, nos Vice-Cancellarius, Doctores, Procuratores, Magistri Regentes & non Regentes, more & loco consuetis convocati; unanimi consensu & assensu super quibusdam propositionibus quæ in libris scriptisque tam idiomate Latino quam Vernaculo publice editis atque evulgatis continentur; quæque non solum Divino Canoni, Decretis Conciliorum, scriptis Patrum, & primitivæ Ecclesiæ fidei & professioni repugnant & contrariantur; sed insuper Monarchicum regimen, Personam sacratissimæ Regiæ Majestatis, pacem publicam, & naturæ ipsius Leges & humanæ societatis vincula subruunt & convellunt; Decrevimus in formulam subsequenter.

*Propositio* 1. Populus est fons & origo Potestatis omnis civilis.

2. Inter Principem & subditos pactum semper vel expressum vel tacitum intercedit, & si Princeps desit officio suo, subditi pactione sua non amplius obligantur.

3. Si



3. Si iusta & legitima potestas migret in tyrannidem, aut secus geratur quam ex lege Divina & humana oportet; amisso omni jure ad imperandum, abrogatur.

*Lex Rex. Buch. de jure Regni apud Scotos. Vindiciæ contra Tyrannos. Bellarmin. de Conciliis & Pontifice. Dolman. Milton. Goodwin. Baxt. R. S.*

4. Suprema apud Anglos potestas est trium ordinum, viz. Regis, procerum, & plebis. Rex coordinata tantum potestate præditus, reliquis minor.

*Lex Rex. Hunton de Monarchia limitata & mixta. Baxter. Polit. Cat.*

5. Nec primogenitura, nec sanguinis proximitas jus ad regnum conferunt, licetque proximum hæredem à successione in imperium prohibere.

*Lex Rex. Hunt Postscr. Dolman. Hist. Succes. Julian. Apost. Mene Tekel.*

6. Licet subditis non modo non consentiente, sed prohibente supremo magistratu in sui & religionis defensionem inire ligas, pacisci fœdera, conjuratasque associationes conflare.

*Solennis Liga & Fœdus. Nupera associatio.*

7. Sui conservatio est primaria & fundamentalis naturæ lex, omniumque aliarum legum cum ista pugnantium obligationem tollit.

*Hobbefius de Cive. Leviath.*

8. Doctrina Evangelica de tolerandis injuriis non prohibet vi & armis resistere Magistratui Religionem violenter oppugnant.

*Lex Rex. Julian. Apost. Apologet. Relat.*

9. Christiani non tenentur ad obedientiam passivam, quoties Princeps contra leges & jura Reip. aliquid imperat; atque primævi Christiani ea tantum de causa pati quam resistere maluere, quod religio Christiana nondum esset Imperatoriis legibus sancita.

*Julian. Apost.*

10. Possessio & potentia conferunt jus Imperii: (a) cujusque causæ bonitatem & æquitatem indicat & confirmat successus, quem urgere est Divinæ voluntati obsequi & providentiæ ductum sequi. (b)

(a) *Hobbesius.* (b) *Owen concio coram Regicidis, Jan. 31. 1648. Baxt. Jenkyns. Libel. supplex Octobr. 1651.*

11. Secundum naturam nullum est boni malique, nullum justus & iniqui discrimen; & status naturæ est status belli, in quo cuilibet jus competit ad omnia.

12. In hoc jure naturali fundatur jus civile, singulis cum societatem ineunt, jure suo magistratui cedentibus, qua cessione magistratui non tam datum quam relictum est jus suum naturale. Nec modo peregrinus hostis, sed & rebellis domesticus in statum naturæ redit, & puniendus est non jure civitatis, sed jure belli; & proinde perduellione sua par jus in vitam Principis consequitur, atque Princeps in vitam sui subditi atrocissimo scelere damnari.

13. Etiam societate inita cuilibet manet jus semetipsum contra vim qualemcunque defendendi; nec potest in Remp. consentiens, jus illud ullo modo in Rempubli- cam transferre. Quod si magna vis hominum ita dudum obstiterit magistratui, ut ex lege singuli mortem metuant, continuo licet illis junctis viribus se tueri; & vis ista quæ primam officii violationem subsequitur, li-  
cet

UNIVERSITATIS OXONIENSIS.

5

cet eam tueatur, non tamen peccat de novo, & si ad vitæ conservationem dirigatur, non peccat omnino.

14. Juramentum nihil superaddit obligationi quæ oritur ex pacto, pactumque eatenus obligat, quatenus fides habetur promittenti. *Quocirca si Princeps quovis modo indicet se subditis fidelitatem promittentibus non credere, illi hoc ipso subjectione liberantur, neque obstant pacta & juramenta quo minus jure contra Principem insurgant, eumque regno & vita exuant.*

*Hobbesius de Cive. Leviathan.*

15. Si populus officio & juramento Principi obstrictus, illum regno nefarie & injusta vi deturbet, & contra fidem & religionem sacramenti sui, cum alio foedus faciat, potest hic populus, pactione prima insuper habita, posteriore teneri.

*Baxter. R. S.*

16. Juramentum omne illicitum est, & Verbo Dei contrarium.

*Quaker.*

17. Obligatio juramenti non ex intentione deferentis, sed suscipientis æstimanda est.

*Vice-comitum Londinensium causa.*

18. Dominium fundatur in gratia.

19. Potestates seculares Jesu Christi prærogativam usurpant, & oportet populum Dei illas omnes exterminare, ut Christo regnum deferant, eumque collocent in solio suo.

*Quintæ Monarchiæ assertores universim.*

20. Regimen Presbyterianum est sceptrum regni Jesu Christi, cui reges perinde ac subditi semet submittere tenentur; & potestas Regia in causis Ecclesiasticis quam asserit Ecclesia Anglicana, est Christo contumeliosa, qui solus est Rex & Caput Ecclesiæ suæ.

*Alare Damascenum. Apologet. Relat. Hist. Indulg. Cartwright. Travers.*

21. Non licet Principibus in cultu Divino præcipere quod non est antecedenter necessarium.

22. Scandalum infirmorum tollit omnem auctoritatem humanam condendi leges de rebus adiaphoris.

*Conciliator Protestantium.*

23. Tyranni & impii Principes morte multandi sunt; quod si Judices & inferiores Magistratus officio suo defint, jus gladii redit ad populum, quo si major pars uti nolit, Pastores & Ministri Ecclesiastici debent Principes Satanæ tradere, & post sententiam Excommunicationis latam, quibuslibet subditis licebit eos occidere, eodem jure quo subditi *Athalam*, & *Jebu Jezabelem*.

*Buchanan. Goodman. Knox. Gilby. Jesuitæ.*

24. Populo Dei etiam post consignatum Scripturæ canonem, in omni ævo novæ Revelationes sunt expectandæ, ad quarum normam actiones suas dirigant vitamque componant, (a) & privatus quilibet à Spiritu Sancto instigatus, jure potest occidere Tyrannum. (b)

(a) *Quak. & alii Enthuf.* (b) *Goodman.*

25. Exemplum *Phineazi* nobis est pro præcepto; quod enim semel probavit Deus & præcepit, illud perpetuo & ubique obliget necesse est.

*Goodman. Knox. Naphthali.*



26. *CAROLUS* primus jure cæsus est, ejusque percussores in generatione sua gloriæ Dei insigniter serviebant.

*Milton. Goodwin. Owen.*

27. *CAROLUS* primus Parlamento bellum ultro intulit, quo in casu licuit illi resistere, utpote jam privato, & qui Regia Majestate prorsus excidisset.

*Baxter.*

Has Propositiones omnes & singulas esse falsas, seditiosas, impias; plerasque insuper hæreticas, blasphemias, Religioni Christianæ infames, & Politicæ Civilis & Ecclesiasticæ subversivas statuimus, decernimus & declaramus.

Porro Decernimus libros in quibus prædictæ propositiones & impia Dogmata occurrunt, aptos natos esse bonos mores & hominum imperitorum mentes corrumpere, seditiones atque tumultus concitare, statum Regnorum evertere, atque ad rebellionem, parricidia & Atheismum manuducere. Et proinde Scriptorum istorum lectione Togatos omnes arcemus sub pœna juris.

Insuper supra nominatos libros in area Scholarum nostrarum manu infami flammis comburendos decernimus.

Porro ordinamus ut ad perpetuam rei memoriam hæc nostra Decreta non modo in Acta Venerabilis istius confessus referantur, sed etiam eorum Apographa singulis Collegiis & Aulis intra hanc Universitatem communicata; in eorundem Bibliothecis, Refectoriis, aliisve locis maxime idoneis, ubi ab omnibus spectari & legi possint, publice appendantur.

Demum præcipimus & firmiter injungimus omnibus & singulis Prælectoribus, Tutoribus, Catechistis, aliisque omnibus quibus Academicæ juventutis institutio concreditur, ut curæ & fidei suæ commissos sedulo instruant & stabiliant in necessario illo Christianæ pietatis capite, quod Ecclesiæ Anglicanæ tessera & character audit; ut subjecti sint omni humanæ creaturæ propter Deum, sive Regi, quasi præcellenti, sive ducibus ab eo missis, ob vindictam malefactorum, laudem vero bonorum. Quod quidem obsequium, liquido, absolute & sine effugiis præstandum esse doceant; moneantque insuper ex præcepto Apostoli, primum omnium fieri obsecrationes, orationes, postulationes, gratiarum actiones pro omnibus hominibus, pro Regibus, & omnibus qui in sublimitate constituti sunt, ut quietam & tranquillam vitam agamus in omni pietate & castitate: hoc enim bonum est & acceptum coram servatore nostro Deo; & speciatim, ardentissimis juxta & assiduis precibus ad Gratiaæ thronum

thronum venerabundi provolvantur, pro salute serenissimi Regis nostri Caroli, ut ab omni grassatorum insultu & perfidorum machinationibus tutus & inviolabilis usque permaneat; fideique defensor a Deo suo pariter defensus, fera & beata Immortalitate perfruatur.

---

F I N I S.

---